

प्रादेशिक समाचार एकांश  
आकाशवाणी रायपुर (छत्तीसगढ़)  
प्रादेशिक समाचार बुलेटिन

18.10 मंगलवार दिनांक 27.08.2024

प्रमुख समाचार –

- देश म डॉक्टर अउ स्वास्थ्य कर्मी मन ल सुरक्षा देवाय खातिर सर्वोच्च न्यायालय डहार ले बनाय गे राष्ट्रीय कार्यबल-एनटीएफ के पहिली बइठका आज दिल्ली म राखे गीस।
- केन्द्र सरकार ह लोक शिकायत के समयबद्ध, सुगम अउ सार्थक तरीका ले निवारण बर दिसा-निरदेस जारी करे हे।
- राज्यपाल रमेन डेका ह न्यायमूर्ति सेवानिवृत्त इंदर सिंह उबोवेजा ल छत्तीसगढ़ लोक आयोग के प्रमुख लोकायुक्त पद के सपथ देवईन।

कार्यबल-बैठक

देश म डॉक्टर अउ स्वास्थ्य कर्मी मनके कामकाज के जगह मन म सुरक्षा देवाय खातिर सर्वोच्च न्यायालय डहार ले बनाय गे राष्ट्रीय कार्यबल-एनटीएफ के पहिली बइठका आज दिल्ली म राखे गीस। कैबिनेट सचिव के अगुवई म होय ए बइठका म कई ठन मुद्दा उपर गोठबात करे गीस अउ सदस्य मन ह अपन सुझाव दीन। स्वास्थ्य मंत्रालय ह डॉक्टर अउ स्वास्थ्य कर्मी मनके सुरक्षा के बारे म एनटीएफ बर सुझाव मांगे बर सुझाव शीर्षक ले एक ठन राष्ट्रीय पोर्टल बनाय हे। मंत्रालय ह राज्य सरकार मन ले उंखर यहां चिकित्सा संस्थान मन म सुरक्षा उपाय के बारे म जानकारी देके अनुरोध घलो करीन हे। पोर्टल म मिले सुझाव ल स्वास्थ्य मंत्रालय राष्ट्रीय कार्यबल के सदस्य मन ल भेजे जाही। एखर बाद एनटीएफ सदस्य मनके संग केन्द्रीय स्वास्थ्य सचिव ह कई झन प्रमुख हितधारक मनके संग गोठबात करही।

उहें, काली वीडियो कॉन्फ्रेंस के माध्यम ले राज्य के मुख्य सचिव अउ पुलिस महानिदेशक के संग डॉक्टर मनके सुरक्षा के संबंध म अल्पकालिक उपाय उपर गोठबात करे जाही।

## केन्द्र लोक शिकायत प्रणाली

केन्द्र सरकार ह लोक शिकायत के समयबद्ध, सुगम अउ सार्थक तरीका ले निवारण बर दिसा—निरदेस जारी करे हे। कार्मिक, लोक शिकायत अउ पेंशन मंत्रालय ह किहीन हे कि सार्वजनिक शिकायत के प्रभावी तरीका ले निराकरण करे बर जारी करे गे दिसा—निरदेस ह मनखे मन ल ससक्त करही अउ ए प्रक्रिया ल सरल अउ कारगर बनाय जाही।

लोगन मन ह अपन सिकायत ल डब्ल्यू डब्ल्यू डब्ल्यू डॉट पीजी पोर्टल डॉट जीओवी म दर्ज करा सकत हे। ए पोर्टल ह सिकायत के निपटारा बर सिंगल विंडो सुविधा के रूप म काम करही। केन्द्रीय मंत्रालय अउ विभाग मन ल ए सिकायत के झटकून निराकरण करे खातिर नोडल अधिकारी नियुक्त करे बर पड़ही। ओमन ल एखर बर एक टन सिकईत सेल बनाय बर केहे गोहे, जउन ह आधुनिक संसाधन के जानकारी रख्य। निपटाय गे सिकायत के बारे म जानकारी लोगन मन ल एसएमएस अउ ई—मेल के माध्यम ले भेजे जाही।

## इंदर सिंह उबोवेजा—शपथ

राज्यपाल रमेन डेका ह आज राजभवन म न्यायमूर्ति सेवानिवृत्त इंदर सिंह उबोवेजा ल छत्तीसगढ़ लोक आयोग के प्रमुख लोकायुक्त पद के सपथ देवईन। अतिरिक्त मुख्य सचिव रेणु पिल्ले ह सपथ प्रक्रिया ल पूरा करईन। ए मउका म मुख्यमंत्री विष्णुदेव साय, विधानसभा अध्यक्ष डॉक्टर रमन सिंह, सांसद बृजमोहन अग्रवाल, पूर्व सांसद सुनील सोनी के संगेसंग कई जून जनप्रतिनिधि अउ बड़का अधिकारी मन ह मौजूद रिहीन।

## भाजपा सदस्यता अभियान

भारतीय जनता पार्टी उहार ले दू सितंबर ले सदस्यता अभियान के सुरुवात करे जाही। नई दिल्ली म आज मीडिया ल जानकारी देवत भाजपा के महासचिव विनोद तावड़े ह बतईन कि अभी जम्मों इन सदस्य मन ल अपन सदस्यता के नवीनीकरण कराय बर पड़ही। ओमन किहीन कि प्रधानमंत्री नरेन्द्र मोदी ह दू सितंबर के पार्टी अध्यक्ष जे.पी. नड्डा ले अपन सदस्यता ग्रहण करही। एखर बाद देसभर म सदस्यता अभियान के सुरुवात करे जाही। श्री तावड़े ह बतईन कि भारतीय जनता पार्टी के संविधान के मुताबिक हरेक पांच बछर म एक घांव सदस्यता अभियान चलाथे। ए सदस्यता अभियान के पहिली चरण ल पच्चीस सितंबर तक चलाय जाही।

उहें, छत्तीसगढ़ म तीन सितंबर ले सदस्यता अभियान के सुरुवात करे जाही। भारतीय जनता पार्टी के प्रदेश अध्यक्ष किरण सिंह देव ह मुख्यमंत्री विष्णुदेव साय ल सबले पहिली सदस्यता देवाही। एखर बाद छह सितंबर ले जम्मों बूथ मन म ए अभियान के सुरुवात करे जाही।

### भिलाई—प्रदर्शन

भिलाई म आज थाना घरे बर जावत कांग्रेस कार्यकर्ता मनके पुलिस के संग झड़प होय के खबर हे। पुलिस ह ए बेरा लाठीचार्ज घलो करीस। मिले जानकारी के अनुसार भिलाई—तीन म आज सिरसा गेट के तीर कांग्रेस नेता अउ कार्यकर्ता मन ह प्रदर्शन करत रिहीन। एखर बाद ए कार्यकर्ता मन ह थाना घरे के तैयारी म रिहीन। एखर पहिली पुलिस ह बल प्रयोग करके प्रदर्शनकारी मन ल धरनास्थल ले हटा दीन। ए बेरा पुलिस अउ प्रदर्शनकारी मनके बीच झड़प होइस, जेमा जामुल थाना प्रभारी ल चोट लगे हे, ओमन ल इलाज बर अस्पताल भेजे गीस।

एखर पहिली, आज पुलिस के टीम चरौदा नगर निगम के सभापति कृष्ण चंद्राकर ल गिरफ्तार करे बर ओखर निवास पहुंचे रिहीस। फेर ओखर गिरफ्तार नइ हो पईस। आरोप हे कि कृष्ण चंद्राकर अउ कुछु

कांग्रेसी कार्यकर्ता मन ह काली दू भाजपा कार्यकर्ता मनके संग मारपीट करे रिहीन। एखर बाद भिलाई जिला भाजपा अध्यक्ष महेश वर्मा अउ विधायक रिकेश सेन के नेतृत्व म भाजपा कार्यकर्ता मन ह काली देर रात भिलाई—तीन थाना के घेराव करे रिहीन। एखर बाद पुलिस ह कृष्ण चंद्राकर अउ घटना म सामिल अन्य कांग्रेस कार्यकर्ता मनके खिलाफ अपहरण के मामला दर्ज करे रिहीस।

### देवेन्द्र यादव—रिमांड

कांग्रेस विधायक देवेन्द्र यादव के न्यायिक रिमांड अवधि ल सात दिन बर अउ बढ़ा दे गेहे। रिमांड खतम होय के बाद रईपुर के जेल म बंद विधायक देवेन्द्र यादव के आज वीडियो कॉन्फ्रेंसिंग के माध्यम ले पेसी होइस हे। एखर बाद बलौदाबाजार कोर्ट ह तीन सितंबर तक उंखर रिमांड ल बढ़ा देहे। खबर के मुताबिक बलौदाबाजार म कलेक्टर अउ पुलिस अधीक्षक के आफिस म होय आगजनी अउ तोड़फोड़ के मामला म पुलिस डहार ले पाछु सत्रह अगस्त के कांग्रेस विधायक देवेन्द्र यादव ल गिरफ्तार करे गे रिहीस।

### सूरजपुर/जगदलपुर—हादसा

सूरजपुर म काली संझौती बेरा एक ठन मकान के दीवाल गिरे ले दू झन लइका अउ एक झन सियान माईलोगिन के मउत होगे। खबर के मुताबिक जयनगर थाना क्षेत्र के फतेहपुर—करतमा गांव म ए घटना घटे हे। बताय जात हे कि ए गांव म एक ठन कच्चा मकान म एक झन सियान माईलोगिन अपन नतनीन मनके संग घर म रिहीन हे अउ लइका के दाई—ददा म खेत म काम करे बर गे रिहीन। उही सभे घर के दीवाल गिरे ले ए तीनों झन मनखे मन ह दब गे रिहीन, जेखर बाद ए तीनों झन मनखे ल अस्पताल म भर्ती कराय बर लेगे गे रिहीन, जिहां डॉक्टर मन डहार ले जांच करे के बाद मृत घोसित कर दे गीस।

ओति, जगदलपुर के पिपलावंड गांव म डबरी तरिया म बुढ़े ले दू झन आदिवासी लइका मनके मउत होंगे। बताय जात हे कि ए दूनों झन लइका मन ह अपन महतारी के संग नल म पानी भरे बर गे रिहीस हे। थोरिक देर बाद ओ लइका मन ह बाजू के तरिया म डूब गे।

### संक्षिप्त समाचार

- भारतीय डाक विभाग रईपुर मंडल डहार ले एक ठन प्राईवेट संस्था के मदद ले नवा आधार कार्ड के पंजीयन अउ सुधार बर इकतीस अगस्त अउ एक सितंबर के नवा रईपुर म एक ठन कैम्प के आयोजन करे जाही।
- श्रीराम लला दर्शन योजना के तहत आज राजधानी रईपुर ले आठ सौ पचास झन भगत मन ल अयोध्याधाम बर रवाना करे गीस।
- राजधानी रईपुर के इंदिरा गांधी कृषि विश्वविद्यालय म उनतीस अउ तीस अगस्त के कृषि अभियंता मनके छत्तीसवां राष्ट्रीय सम्मेलन अउ संगोष्ठी के कारीकरम करे जाही।
- जांजगीर-चांपा सिटी कोतवाली पुलिस के टीम डहार ले ट्रक म भरे बीस ठन मवेसी मनके संग दू झन आरोपी ल गिरफ्तार करे गीस।
- राजनांदगांव म लोगन मन ल डरवाय अउ धमकाय के आरोप म एक झन मनखे ल पुलिस ह गिरफ्तार करीन। ए आरोपी तीर ले एक ठन देसी कट्टा घलो बरामद करे गेहे।

\*\*\*\*\*